


9062
MS



LE
MARTIRE
DES DEUX FRERES

CONTENANT AV VRAY TOV.

TES LES PARTICVLARITEZ PLUS

notables des Massacres & assassinats cōmis

és personnes de treshaults, tref-puissans,

& treschresties Princes, Messeigneurs le

Reuerendissime Cardinal de Guyse

Archeuesque de Reims. Et de Mon-

seigneur le Duc de Guyse Pairs de

France. Par Henry de Valois à

la face des Estats dernie-

rement tenus à

Bloys.

M. D. LXXIX.

THE NEWBERRY
LIBRARY

SONET.

Qui vouldra d'esconrir la ruse & la faintise
 D'un pariure fausant son sermant & sa foy
 Qui vray mocqueur de Dieu violant toute loy
 Et tout couuert de fart veut opprimer l'Eglise.
 Qui vouldra voir à nud sous une robe grise
 Un hermite masqué d'un beau tilire de Roy
 Du peuple le fleau la ruine & l'effroy
 Sans Dieu, sans foy, sans loy, le veut duiure a sa guise.
 Qui vouldra voir encor combien de cruantez
 Combien de trahisons & de desloyantez,
 Faictes par un Tiran en la ville de Blois,
 Qu'il lise ce liuret & il verra comment,
 Iamais il ne c'est veu plus maudit garnement,
 Pour pratiquer tels faits que Henry de Valois.

ANAGRAMME DE L'AUTHEVR
 Y PRESCHÉ LE SALVT.



LE MARTIRE DES
DEUX FRERES.

Contenant au vray toutes les particularitez
des Massacres & assassinats commis és
personnes de treshauts, tres-puissants, &
Tres-chrestiens Princes, Messeigneurs le
Reuerendissime Cardinal de Guyse Ar-
cheuesque de Rheims. Et de Monsei-
gneur le Duc de Guyse, Pairs de France.
Par Henry de Vallois à la face des Estats
dernierement tenus à Blois.



L n'y a celuy de vous Messieurs
qui auec ce grand Roy n'adiu-
giez, donniez l'honneur & le pris
à ce tres-certain axiome pro-
noncé apres plusieurs dispu-
tes & traittez faicts deuant luy,
à sçauoir quelle chose du mède estoit & debuoit
estre la plus forte, ou le Roy, ou le vin, ou les fem-
mes, fust en fin tenu & resolu que *super omnia vin-*
cit veritas, la verité maistrise & surmonte toutes
choses, d'autant que quelque fart ou couleur
que les ennemys d'icelle, y puissent dōner en fin
comme le Soleil bien souuent est obscurcy par

quelques espais nuages, toutesfois par la force & vertu naturelle se faict voye & passage au tra- uers de ceste obscurité, dissipant ces broüillars, puis apres nous apporte vn beau iour & descou- ure de sa gaye clarté ce que la sombre obscurité receloit à nos yeux, ainsi la verité est bien son- nent cachée du mensonge grossier, mais en fin elle se faict paroistre.

Je ne doute point & vous le scauez & confes- serez avec moy combien de desguisement com- bien de couleur, combien de mensonge, com- bien de masque & de fart les enfans du diable & ennemys de toute verité ont faulxement inuenté pour couvrir, palier, desguiser & voyler la veri- té des choses plus que vrayes & tres-certaines aduenus aux Estats derniers à Blois les vingt- trois & vingt quatriesme du mois de Decembre à la face & Majesté desdicts Estats & gens de bien & d'honneur deputez esleus & choisis par toutes les villes & Prouinces de ce Royaume sur les meurtres, massacres, assassinats, trahisons, emprisonnements, pariuremens, violence & au- tres indignitez commises & perpetrees par la perfide & faulce foy de Héry de Vallois, ou pour plus proprement parler par son anagramme vil- lain herode, sans la grace de Dieu naguere soy disant quoy qu'indigne Roy de France & de Polongne.

Es personnes des tres-hault tres-puissants tres-Chrestiens & tres-magnanimes princes mes- seigneurs le reuerendissime Cardinal de Guise, &

monseigneur le Duc de Guise son frere, Princes du sang, premiers Pairs de France, Archeuesque de Reims, lieu du sacre des Rois de France, & de Monseigneur le reuerendissime Cardinal de Bourbon premier Prince du sang, Archeuesque de Roüen de monsieur le Primat Archeuesque de Lion. De Madame de Nemours, petite fille du Roy Loys douziesme mere desdits Seigneurs de Guise, Monseigneur D'albœuf cousin desdits Seigneurs de Guise, Messieurs de Nemours frere de mere d'iceux, & Prince de Gynuille fils dudit Seigneur de Guise, Messieurs le Preuost des Marchands de Paris, President de Neully, & aultres signalez personages.

La verité desquels massacre & emprisonnement ne peult qu'en despit de tous les meschans maudits, & malheureux regalistes & politiques, ne soit plus que la chose en plein midy congneue ce que le plus succinctement qu'il me sera possible, vous monstreray & feray entendre par ce tragique & present discours à nu & au vray, les ruses, les simulations, les hipocrisies & le fait que ce cruel tyran a par tant d'annees couué & caché, en son traistre estomach & son ame endiablee, contre l'honneur de Dieu & de son seruice, au detrimement de sa religion à la perte & ruine totale du pauvre peuple & perpetuel desastre de ce Royaume.

Ce fut à nostre grand regret que le Roy Charles neufiesme graua en mourant sur son tombeau

augure veritable de nostre defastre & malheur, lors que de grand zele & affection dit qu'il ne mouroit fâché de quitter ceste habitation terrestre : mais beaucoup plus pour l'amour qu'il portoit à ceste patrie sienne & naturelle, ayât vn regret eternal de laisser ce pauvre & desolé Roy-aume entre les mains de ceux qui luy deuoient succeder, l'vn estat heretique, & l'autre ateiste, cōme fort biē ce bon Roy l'auoit congneu & biē re marqué en ce traistre, par le bon office qu'il fit aux heretiques Rochelois ayât ce facquin d'vn lasche & casanier courage proditoirement au des-pent de ce bon Roy, & de la France vendu aus-dits Rochelois, leur Rochelle premier acte & prouesse des vaillantises de ce Iudas.

Dés lors & de ceste mort commença nostre ruyne & que sur nous c'est hypocrite trama le commencement de ses mal-heureux & inique desseings, n'estant plustost sorty de la taniere polonoise que ce sacrilege malheureux osa Polluer les saints & sacrez lieux, profaner les Eglises les saintes & excellentes reliques & commença le chef-d'œuvre de ses larcins en l'Eglise de la sainte Chapelle de Paris, ayant faict rompre briser, sier & limer les barreaux de ladicte Chapelle, & furtiuement par ses ministres sacrileges destober le plus beau, le plus saint & sacré ioyau qui fust non seulement en ladicte Chappelle ains en toute la Chrestienté à sçauoir la vraye Croix de Iesus Christ nostre Sau-
u *leur* *acquis* *&* *enrichy* *auec* *tant* *de* *peine* *&* *la-*
comu

beur par les predecesseurs Roys, nous monstrée
à veüe d'œil par ce premier coup d'essay comme
il estoit bien scauant tant en la theorique que
pratique en la detestable, malheureuse & dam-
nable doctrine de l'ateyste Machiauel ayant par
apres mis ce ioyau en gaige à Venise pour de
cest argent satisfaire a ces ordes lasciuetez.

Pratiquant la susdicte doctrine ce Sardanapale
pour nous mieux engeoler ce voulut masquer &
voiler du voile cōmun à tous meschans, à sca-
voir de la pieté & deuotion pour soubz ce voi-
le executer la deprauée volonté qu'il a tousiours
eue emprainte en son viperin courage d'opprimer
& ruyner l'Eglise & la religion de laquelle ce
meschant en la seule apparence faisoit professiō,
de mesme le malicieux pescheur cache l'ameçon
de l'amorce, afin que le simple poisson y soit pé-
du par sa credulité, les daces les decimes ordi-
naires & extraordinaires, les leuees de deniers,
les alienations & les ventes, non seulement des
heritages & immeubles: mais iusques à vendre
les ornemens, ioyaux, reliquaires & calices des-
dictes Eglises, sont asseurez tesmoignages qui
ne peuuent estre dementis.

Les cachots construits par cest hypocrite n'e-
stoient que pour seruir de couuerture à ses las-
ciuetez, meschancetez, ordures & sodomies. Le car-
dinal d'Espernon, en scait bien quelque chose lequel
ne m'en peut dementir, les plus sages ont fort bien
bien dit que ce n'estoit qu'un amuse fol, & ces
cages ordonnees pour y mettre d'autres oyseaux

qu'une simplicité religieuse qui a esté le vray moy pour se sequestrer de tous les princes & gés de bien qui n'estoient (cōme cest apparent hermite) touchés au cœur de l'esprit d'hypocrisie.

Ces cachots me semblent avoir esté inuentez à deux fins la premiere pour y attraper les plus simples, qui s'y fussēt voulus embarasser, la seconde pour avoir suiet & pretexte de ceste edification nouvelle & establissement de nouveaux moynes, ruyner & destruire les belles, saintes, riches, grandes & opulantes Eglises, afin que les grosses & riches estant ruinees, celles qui pretendoit establir pauvres, il eust quand bon luy eust semblé donné & aux vnes & aux aultres comme l'on dit coustumierement du pied au cul, c'estoit le conseil & langage commun de ces sectaires Espernonistes, politiques, & ateistes que ces moynes estoient trop gras, qu'ils possedoient la meilleure partie & les plus beaux reuenus de son Royaume, que l'Eglise le tenoit en bride & luy feroit la guerre en vn besoin, à cause de ces trop grandes richesses que luy & sa noblesse n'auoient rien au pris, qui fut le vray subiect pour lequel il commença vn si beau mesnage, pour le commencement duquel & prelude de sa tant sainte intention, l'Abbaye du val nous doit seruir d'exemple.

Or voyant que par ces comportements, par les dances, balais, mommeries, mascarades, banquets & aultres inutiles despences & superfluités, pour la lasciuete, on ne remarquoit rien

moins

9

moins en luy qu'un esprit penitent, mais
 plustost vne ame orde, sale, ville & basse,
 ne s'occupant a pas vn seul bon exercice,
 c'est trouué de luy mesme offensé de ceste opi-
 nion qu'à bon droit on auoit de luy, & vo-
 yant qu'apres tant de daces, d'impost, d'em-
 prunts, tant d'Estats nouueaux, que gabelles
 iournellement augmentez, le peuple com-
 mençoit à murmurer & entrer en deffian-
 ce pour l'assistance, le port & les intel-
 ligences que ce malheureux de iour en iour
 pratiquoit avec les heretiques, tant de Bear
 Genesue, Angleterre que d'Allemagne, le voya-
 ge du periure de Nogarets vers le Biarnois l'al-
 lience & protection des heretiques geneuois,
 la iaretiere receüe en l'Eglise de Saint Ger-
 main de Lauxerrois, avec tant de solemnité de
 la part de Iesabel Angloise, qu'il nomme sa bõ-
 ne sœur, & l'armee tant soudainement venue
 en ce pays, sont preuues suffisantes de la bon-
 ne affection qu'il auoit enuers nous, ce qu'il
 a tousiours couué & caché aux plus creux de
 sa maudite poitrine.

Et aperceuant que le peuple estoit ferme,
 resolu & constant en sa religion, & qu'il seroit
 du tout impossible luy arracher des mains, se
 resolut en la maxime de son bon pedagogue
 Machiauel, que pour vn temps il faut prendre
 l'habit de regnard, & puis apres labit de lyon,
 ce qu'il a si bien aprins qu'en matiere de mas-
 que, de cautelle, & dissimulation, il ne se peut

trouuer son pareil pour mieux iouer son personnage, avec le moyen susdit se sequestre de tous les bons princes zelez & affectionnez à l'honneur de Dieu, au maintien de la religion Catholique apostolique & Romaine, & au repos & conseruation du pauvre peuple, supposant & mettant en leur lieu, colloquant es grandes charges & dignitez de petits auortons, bastards, sangsues, macquereaux & ministres de ses vilains, ords, salles, & desordonnez appetits, si que soubz main par eux & en endormant le peuple par son hipocrisie, là tellement avec ses esponges succé& rongé, qu'il ne luy reste plus qu'une foible & debile parole.

Que si aulcun meü en la conscience s'est ingeré luy en faire quelque remonstrance, des aussi tost a esté chassé & porté contre iceluy vne perpetuelle inimité & cruelle indignation, ce qu'il a faict paroistre & mis en lumiere, à la veüe d'vnchacun contre mondit Seigneur de Guyse & toute sa maison, pour auoir tousiours esté vray supports & appuy, & les vrayes colonnes de l'Eglise, de son Estat, & couronne, & du pauvre peuple, ayant pour ses causes ce Prince & les siens en telle indignation qu'il ne se passe iours, heures, ny minutes, qu'il ne recherche les moyens par lesquels il pourra destruire & exterminer ceste tât noble & vertueuse maison.

Et pour y paruenir il enuoya en Allemagne

(faict soubz le nom du Roy de Nauarre) leuer iusques au nombre de cinquante mille hommes, payez de ses propres deniers (ie me trompe de ses propres deniers, mais desrobez & vsurpez sur nos Eglises) en intétion que ces barboüillez accableroyent ceste maison & n'ayant cest affaire reussy selon son desir, ains ceste grosse armee ennemye venus en esperance du butin que ja ils se promettoyét de nos despoüilles, & principalement de la tres-riche & tres-opulente ville de Paris, ayant esté mise en route & deffaicte par ledict Seigneur de Guyse, avec vne bien petite troupe, tant s'en faut que ceste acte genereux amolist le diamantin & empierré courage de ce cruel, qu'au contraire la ialousie faist tellement son cœur lasche, que continuant son desdain, il ne pratique & recherche nouueaux moyés par lesquels il puisse esteindre la memoire, l'honneur, la gloire, & la souuenance deüe aux actes genereux & signalez de ce vertueux Prince, s'attribuant à luy-mesme l'honneur de ceste belle victoire, & voyant que tout le peuple ensemble & principalemēt les Parisiēs ne voulurēt auouer cest article, il entra en telle rage à l'encontre d'eux que dés lors mesme, cōiura & arresta de les ruyner, ce qu'il eust faict n'eust esté que par vne grace particuliere & miracle spécial de Dieu, qui fit soudain paroistre mon-dit seigneur de Guyse, au temps de ceste coniuratiō en ladicte ville, apaisant par sa presence la iuste

douleur & cholere du peuple, qui en fin de cōte se fust resoluë & terminee sur la teste de ce maudit tyran, & sur celles de ces affamez fatalistes & Machiauelistes, le iour des barricades. A quoy ce meschant ayant failly luy & les siens se sentāt tellement bourrelez en leur ame prirent le remede ordinaire des lasches de courage & effeminez qui est de fuir, se laissa par ce traistre conseil comme vn ours mener par le nez, lequel conseil ne demandoit qu'à ce sauuer sçachāt que le temps leur eut faict rendre conte des exorbitans larcins & infinis trahisons, que par vn si long temps ils auoient commises, faisant entendre à c'est effeminé qu'il se sauuaſt bien tost, & qu'on le vouloit ruer, auquel mensonger conseil, ce menteur se laissa transporter encore qu'il sçeuſt bien cōme ledit Seigneur de Guyse vsant à l'endroit des siens de sa bonté & clemence accoustumee & de trop de respect en son endroit, auoit deliuré les suisses, d'O, d'Aumont, Grillon, & Byron avec leurs troupes, du milieu des armes Parisiennes, & les auoit renuoyees en seureté en son chasteau du louure, neātmoins picqué du ver de sa conscience, par la pourpensée trahison, s'enfuit comme vn cocquin par la porte neufue, & s'alla comme vne esclauue refugier à Chartres.

Ce subiect & soudain partement & ceste prompte fuitte, ne donna pas petit estonnement à ceux qui de plus pres remarquoient les

choses & s'estoient beaucoup qu'apres tāt de communications de demonstrations d'amitié, que ce traistre auoit eüe avec ledict Seigneur de Guyse, n'auoit amené les choses à meilleur poinct & dit-on des lors, que ledict Seigneur auoit beaucoup à se garder, & que c'estoit reculer pour mieux saulter, ce que ce traistre monstra assez ouuertement lors qu'en sa fuitte du hault d'une montagne il regarda Paris, iurant par plusieurs foyes, qu'il feroit que le pere diroit à son enfant vn temps auenir, voyla ou fut Paris, & que iamais il ne seroit rassasié & satisfait, qu'il ne se fust baigné dans le sang des habitans de ceste tres-saincte & tres-catholique ville, disant ces mots & ne s'en fyes en moy qui ne voudra.

Nonobstant ledict seigneur de Guyse ensemble les bons Bourgeois de Paris, vfans d'un trop grand respect pour la conseruation de celuy qui ne brasloit que sa ruyne, enuoyerēt par deuers luy personnes des trois Estatx pour luy faire entendre au vray comme pendant lesdictes Barricades les affaires s'estoyēt passez, & remontrèrent qu'ils estoient tres-marris qu'il eust cest opinion qu'ils luy eussēt causé par quelque rebellion ceste absence, ce traistre est bien fier de ceste recherche quoy que veine, d'autant qu'il n'aspiroit qu'à leur ruyne, feignit pourtant auoir pour tres-agreable leur remonstrance, & qu'il ne desiroit riē plus que nourrir son peuple en paix & en trā-

quilité, & pour leur faire bonne bouche, fit vn
 Edict de suppression & reuocation de quel-
 ques impostz, nouuelles charges, & multiplici-
 té d'Estats, que ceux qui n'auroyent payez les-
 dictes taxes & nouuelles charges, ne pour-
 roient estre cōtraincts aux paiemens d'icelles,
 & lesdicts Estats nouueaux supprimez és lieux
 où il n'y en auoit de pourueuz, qui estoit vne
 pure vraye & simple befflerie, de laquelle il
 commença à nous embaboiner.

Après ce traistre infidele & perfide, ne trou-
 uant assurance ou n'estimant estre assuré au-
 dict lieu de Chartres delibera s'en aller à Roüë,
 quoy executant passa à Mante, auquel lieu il
 bastit & fonda les pillotis de tous ses iniques
 meschants & malheureux desseins, & arresta
 toutes les trahisons qui depuis s'en sont en-
 suyues, d'où sortant alla & sejourna quelques
 iours à Vernon, & depuis s'achemina audict
 Roüen, où il se comporta avec ces modesties
 accoustumees, que bien peu de iours se passe-
 rent que les rolles de Roüen ne mandissent
 l'heure de l'auoir si promptement receu.

Là il est visité de Monsieur le Prenoist des
 Marchans de Paris, qui au nom de tous les ha-
 bitans dudict lieu, le supplyent prendre les
 choses au vray & ne prester l'oreille aux rap-
 ports mensongers, qu'il leur face cest honneur
 de reuenir en ladicte ville, qui estoit tout le
 plus de leur desir, & qu'il y trouueroit ses sub-
 iects plus & autant affectionnez qui luy furēt

iamaïs, il ne manque point de belles respon-
 ses & que son plus grand plaisir estoit d'estre
 & habiter en ladicte ville, cōme auparauant il
 l'auoit bien monstré y ayant faict vne si lon-
 gue demeure, mais que iamaïs il n'y entreroit
 qu'il n'eust apporté vn repos asséuré & n'eust
 exterminé tous les heretiques & perturbateurs
 du repos d'icelle ville & pour leur monstrer de
 quel pied il y vouloit marcher doreſnauant
 par son Edict, voulut estre le protecteur & cō-
 ſeruateur de l'vnion laquelle il vouloit estre
 iurée solennellement par tous les Estats de sō
 Royaume, & apres ce vouloit assembler iceux
 pour entrer en vne bonne ſaincte & ſalubre
 reformation, cōme il le dit de bouche, il l'exé-
 cute en papier & iurant toutesſois qu'au cas
 qu'il contreuint audit Edict d'vnion, enſemble
 de ce qu'il ſe ſeroit arreſté ausdicts Estats, il
 quittoit tous ſesdicts ſubiects du ſerment de
 fidelité, & de iamaïs le recognoiſtre pour no-
 ſtre Roy.

Lesdicts Estats ſont publiez à certain iours
 en la ville de Bloys, chacun en ſon endroit tāt
 en general qu'en particulier, nomme & eſlit
 les perſonnes les plus capables & dignes qu'il
 iugeoit pour y aſſiſter en toute ſeureté & liber-
 té, pour y dire librement, & ſās crainte vn chaſ-
 cun & remōſtrer à ſa Mjeſté ce q̄bō luy ſēbleroit
 qui eſtoit le maſque qu'il prenoit pour iouer
 l'acte derniere de la funeſte tragedie : mais
 d'autāt qu'il y failloit faire cōparoître le prin-

cipal personnage d'icelle, qui estoit monditz
 Seigneur le Duc de Guyse, fit tât enuers la Roy-
 ne sa mere, qu'elle l'induist à s'y acheminer
 apres les instantes prieres de laquelle ce bon
 Prince ne voulut contredire, tât pour faire pa-
 roistre l'affection qu'il auoit au bien public, &
 de voir vn bon ordre estably en toutes cho-
 ses, que mesme pour presenter & monstrier de-
 uant vne si celebre assemblee son innocence.
 Ioinct aussi qu'il n'y eust eu iamais hōme qui
 oFAST iuger & estimer qu'au cœur d'vn Roy de
 France soy disant tres-Chrestien, portant l'ha-
 bit de douceur & simplicité, il se fust trouué
 tant de trahisons d'infidelitez & cruautez,
 hélas! qu'il l'eust pensé, les diables mesmes ne
 l'eussent voulu songer, apres tant de promes-
 ses, apres tant de sermens, apres tant de vœux,
 en vn lieu sacré, à la face des Estats, en sa pre-
 sence, en sa propre chambre, voire en son pro-
 pre cabinet, auoir meurtry sō propre sang, ses
 propres cousins, les premiers officiers de sa
 Couronne, les premiers Pairs de France: les
 premiers Cheualiers de son ordre, les pilliers
 & l'appuy sur lesquels son autorité, sa gran-
 deur & sa couronne estoit appuyee.

Ce qui inuite le ciel & la terre à en crier &
 prendre vengeance, & non seulement des exe-
 crables & malheureux assassinateurs, mais aus-
 si des fauteurs endiablez d'iceux qui s'effor-
 cent coulurer vn acte si detestable, par faulces
 impositions, viles & friuoles calomnies, par
 trop

trop apparentes, non moins contre les froids & tepides moyenneurs, qui confessent bié que c'est vne tres-meschante, incomparable & maudite impieté, mais que c'est le Roy, que c'est vne chose faicte à quoy on ne peut plus dōner ordre ny remedier, qu'il vaudroit beaucoup mieux se contenir & ne l'irriter d'auantage, comme l'on fera prenant l'occasion laquelle Dieu nous presente, pour nous en deliurer, & des maudites sangsuës qui tousiours l'accompagnent, voulant par leur conuiuēce nous priuer de toute raison, iustice, & liberté, & par ce moyen doresnauant nous faire viure en beste.

Mais ie les coniuire par la verité mesme de declore & desciller leurs yeux, que la nuit de leur crasse ignorance à iusques icy tēnuz au sōmeil de leurs voluptez, & recognoistre que l'abisme des énormes & execrables pechez, que ce Henry Heliogabalisé à cōmis, ont tellement offusqué & empesché les rayons de la lumiere celeste en son ame, qu'il marche à bride abbatuë, & comme vn poulain sans frain, se transporte ou l'appetit de ses effreences concupiscences le pousse, sans se pouuoir garder ne y remedier, cela venant & procedant de ce que comme dit l'Apostre, que *commutauit veritatem dei in mēdaciū propterea quod Deus tradidit illum in reprobū sensum*: il a cōmué & chargé la verité de Dieu en mensonge, & pour ceste cause Dieu l'a mis & liuré en sens reprob-

ué ayant faict seruir de couuerture & badina-
 ge à ses meschancetez & impietez, ce qui estoit
 de la pieté & religion, & pource à faict cest
 acte, acte qui n'a iamais esté hors de l'opinion
 des gens de bié, qui plus particulièrement co-
 gnoissent ce meschant, sçachant fort bié qu'é-
 fin il donneroit du croc en iambe par ses de-
 bordemens, à sa religion, à son Estat, à son
 peuple, & à sa patrie, & que de là, sortiroit
 son éternelle ruyne, ayant Dieu permis que
 cest Absalon reprouué en sanglâtast ses mains
 scelerees du sang des deux plus fermes & sta-
 bles pilliers de son Eglise, pour faire paroistre
 & mettre en notoyre euidéce la deprauce vo-
 lonté qu'il a tousiours eu de la ruyner, car cō-
 me le feu ne se cognoist feu, qu'en tēps qu'il
 eschauffe, & qu'il brusle: de mesme le mes-
 chant par l'acte meschante qu'il commet, la
 cause est cogneuë par son effect, de mesme si
 iusques icy, pauvre abusé, tu as eu opinion de
 ce meschant, & las cogneu, dis-tu pour tres-
 Chrestien & Catholique, maintenant tu le
 peux cognoistre pour tres-meschant ennemy
 de ton Dieu, de la religion, de toy & de ta
 republique, afin de te ranger, ayant cogneu
 ces abominables resolutions & executions,
 au bercail de ceux qui deüestus de toute pas-
 sion, ne respirent rien plus que quitter l'obeyf-
 sance de ce tygre, cruel, tiran, inhumain, &
 idole maudite, pour honorer & seruir seul ce-
 luy duquel despend l'estre, la vie, conserua-

tion & le contentement de tous les hommes.

Le lieu & la personne de la tenue desdicts Estats, d'onoier assez à cognoistre le fruit qui en viendroit quand au lieu, ie m'en rapporte à ceux qui y ont plus frequenté, & diray apres quelque autre, que les trois parts de ladicte ville sont heretiques ou atteystes, & le reste putains, ioinct l'augure precedant ce malheur adueni en ladicte ville, en laquelle fut surpris vn meschant ayant affaire à vne anesse, pour lequel acte, & luy & l'anesse, furent bruslez ensemble, enuiron trois moys auparauant la tenuë desdicts Estats. Quand à la personne, c'estoit vn Roy, qui de bouche demandoit sa propre reformation autant que qu'il diroit le disciple demander le fouët à son maistre. O que vraiment on pouuoit dire qu'il estoit touché de l'esprit de Dieu, si l'interieur eust esté correspondant à l'exterieur: Quant aux causes, c'estoit pour reformer tous & vn chacun les abus des meschans, pour reformer les simonies & maquignognages de benefices, & sincoper la pluralité d'iceux, couper & arracher la racine des heresies, cesser les violéces, pilleries & vsurpatio's, tât de la noblesse, que de la gendarmerie, oster les superfluitez & le luxe du commun, bref remettre les choses en leur pristin estat, mais las! la partie estoit trop forte, & trop de meschans s'y opposoient, que l'on iugeoit assez, qu'ils inuenteroiēt tous les stratagesmes à eux possibles, pour empescher

le cours d'une si sainte resolution.

Et pour monstrier que le tyran estoit le premier qui s'y opposoit par tous les reculemens qu'il luy estoient possible, avec la plus grande contrainte que l'on pourroit penser conclud & iura l'Edit d'union, & quant & quāt, que nul succederoit à la couronne apres luy, qui fust heretique soubçonné d'heresie, ou fauteur des heretiques, ce qu'il passa & accorda, plus par l'importunité desdicts Estats, que de volonté, que iamais il y eust apportee.

Comme au semblable avec tres-grand regret accorda la requeste de messieurs du tiers Estat pour la diminution des tailles, daces, & impôts, & pour la recherche de ceux que l'on cognoissoit avoir pillé la France & se sont enrichis de la sueur & sang du pauvre peuple, avec icelle l'occasionna que depuis que la presente requeste luy fut presentee, qui fut au commencement du mois de Decembre dernier, il ne s'estudia par ses hypocrisies ordinaires & accoustumées, qu'à tramer & ourdir l'execution de sa tragique & sanglante trahison, pour oster tout soupçon d'icelle, il fit courir un bruit qu'il se confioit tant audit seigneur de Guise qui le vouloit faire connestable de France, & pour plus donner d'apparence & de couleur à son faict, faignit chasser & eslongner de luy ces affamez sangsues & son mauuais conseil, cela estoit le commun langage qui se couloit & glissoit par toute les compagnies &

l'entretien ordinaire des banquers, & pour-
menades de la court, mesme que iusques à là
que de faire tenir le conseil de la guerre au lo-
gis dudit seigneur de Guyse, d'où plusieurs gés
de bien & dignes de foy, veirent sortir les ma-
reschaux d'Aumont & de Retz. la les pauvres
archers de la connestablerie s'estimoient tres-
heureux, d'estre tóbez aux mains d'un si ma-
gnanime Prince, & tels estoient leur propos
ordinaires les capitaines des gardes luy alloiét
faire la court à la table du grand maistre. Les
mignons mesmes ne s'y espargnoient pas.

Ce traistre en apparence & en public, luy fai-
soit tels signes & demonstrations d'amitié,
que le diable mesme n'eut peu iuger en son
ame qu'il y eust logé vne si vilaine & poltron-
ne execution, pour laquelle mieux voiler &
cacher, voulut couvrir & colorer son menson-
ge de la verité mesme, qui fut pour le certain,
à cause que ce bon prince luy fit entendre cō-
me il estoit aduerty de ceste inique & iniuste
entreprise, pource le lendemain de la conce-
ption de nostre Dame, qui fut le vendredy
quinze iours au parauant le massacre, ce trai-
stre temeraire fit appeler les principaux de-
putez & en leur presence, & des bons princes
assassinez prisonniers, & aultres seigneurs &
gentils hommes de sa court, apres s'estre con-
fessé à sa mode qui est ne vouloir & n'estre per-
mis à son confesseur, l'interroger de chose
quelconque, que de ce qu'il aura soy mesme

confessé auquel il interdit & deffend ne parler des affaires qui concerne son Estat, & fut en cest action tellement masqué, qu'aucuns de la compaignie, gens de bien luy veirent tomber les larmes des yeux. Ha! traistre mal-heureux, & meschans, hélas! as tu les yeux si tendres, & le cœur tant endurcy, apres ce il vsa de ces mots ou semblable voyant le précieux corps de Iesus Christ.

Je vous ay tous icy mādéz, pour dire & iurer sur le corps de mon Dieu, que ie voys receuoir en vostre preséce, que ie iure de rechef, la sainte vnion ie m'vnis de rechef avec vous tous, & tellement que iamais ie ne men departiray, & ne feray aultre chose, & ne reposeray que ie n'aye entierement extirpé l'heresie, & les heretiques de mō Royaume, ie vous cōiure tous de m'y assister comme vous me l'avez saintement promis, & de ma part ie proteste sur ce saint sacrement d'y satisfaire, ou que ceste reception soit à ma perte: à ma ruyne & entiere confusion, & quand i'aurois cent dagues contre la gorge, iamais ie ne desisteray ceste sainte entreprise, lesquels propos entendus de toute l'assistance, aucuns de ceux cōme ie croy, qui ne iugeoiēt que à l'exterieur, en signe d'alegresse crierent viue le Roy.

O Dieu eternal, ie ne puis qu'avec ce vaisseau delection ie ne die, ô haulteur, & profondeur de labisme de la sapience & science diuine, combien sont incomprehensibles vos iu-

gements, & vos voyes & sentiers mal-aisez à comprendre que vous qui estes le createur, vous qui estes la verité, vous qui estes la vie, hélas la maudite creature mésongere, & mortelle abuse de vous, de la verité en ordit sō mē songe, de vous qui estes la vie, ce masque pour en brasser vne cruelle mort, vostre saint & pain celeste est mis deuant les chiens. Mais las, vous avez bien permis, qu'un iudas vous ayt trahy, vendu & liuré, un iuge inique condamné, & les meschās crucifié mais ô seigneur! vous reseruez à faire congnoistre vostre grandeur & puissance à la fin, car il est dit que ceux la, *videbunt in quem transfixerunt*, ainsi ce meschant trouuera à sa cōfusion la punitiō, rigueur & pēsāteur de vostre rigoureuse iustice, voyāt ceux glorieux deuant vous lesquels par vne demōstration & apparence, si sainte, il a proditoirement faict meurtrir & assassiner.

Le dimanche suiuant ce solemnel serment, mais plustost execrable blaspheme, vn docteur Seigneur prescha aux Iacobins, à l'assemblée de tous messieurs les deputez, où il loüa ce qu'il se pouuoit, ce meschant iusques à le comparer à Saint Iean Baptiste, duquel parloit l'Euangile courante, mais le bon Seigneur comme ie croy, n'auoit iamais disné à la table de frere Henry, car au lieu de racines, & d'eau dont vsoit Saint Iean aux deserts, eust veu les crapules, & superfluitez des viandes, & diuersitez des vins, les plus exquis au lieu

de se retirer en ces hermitages, & susdits cachots, pour retrancher ses vices, c'est la où il donnoit plus d'aïse à son corps, & où il prenoit plus de delices, au lieu d'une sainteté de vie, ne s'y trouuera qu'une faine aparence, & plus grande hypocrisie, au lieu de chasteté, & pudicité, rien que bordelage, luxure, sodomie, & lascivité, les freres de la table ronde, en scauroient biē parler, au lieu d'y faire prescher & annoncer Iesus Christ il n'eust veu que faire honneur au diable, & à l'ante christ, le Crucifix d'argent ayant un diable à dextre, & à senestre, trouué en l'hermitage, & oratoire dudit Henry, est vray tesmoing de ses austeritez, ce bon predicateur recita en la dicte predication, les mesmes sermens & protestatiōs de ce pariure, après laquelle le Te deum laudamus en fut chanté en l'Eglise desdits Iacobins, par les chantres & musiciens de la Royne mere elle presente.

Quatre ou cinq iours apres, cest hipocrite fait semblant de donner cōgé à Chenaille, & au medecin Miron son frere, puis au commencement de la sepmaine du massacre, on fait courir le bruit, que le reste du pernicieux, dānable & Architofeliste conseil, auroit son cōgé du nombre, desquels estoient les mareschaux d'Aumont, & de Rets, l'Euesque de Paris son frere, les Remboüilllets, d'O & plusieurs autres de mesme farine, qui ne valēt pas mieux l'un que l'autre.

Au mesme

A mesmes temps, d'Antragues, gouverneur d'Orleans, sous couleur de luy oster son gouvernement, & a d'Antraguet son frere est mādē, l'accord pendant ce faict le dimanche de deuant le massacre entre le seigneur de Montpensier & d'Antrague.

Or ce meschant tiran, pour couvrir tousiours & farder sa traitresse volōté, & affin que ce prince debonnaire n'estimast que iamais on vōusist executer chose si miserable, est tant aliéné de raison en vn lieu qui de tout temps a esté tenu pour lieu d'asseurance & franchise, ce malheureux sur ce subiect inuenta vn stratagemme auquel peu de personnes peult estre ont pris garde, qui fut qu'il induit Sauorny seigneur de luth, donner vn soufflet dedans sa chambre au valet de Martinot son horloger, lequel n'en faisoit pourtant aucune plainte, mais le traistre meurtrier qu'il auoit fait faire n'attendit pas lesdittes plaintes ains faignit se mettre en cholere plus grande que iamais on le vit, faisant vn grand cas de ce que sa chambre estoit vn lieu sainct voire autant a respecter que le maistre autel (disoit-il) car comme vn Nabuchodonosor il n'est honteux, de non seulement se comparer ains s'egaller à Dieu, & pource ne vouloit que ce crime fust, & demeurast impuny. Pourquoy ledit Sauorny faignit de gagner au pied, il est adiourné à trois briefs iours, on a leu les affiges à la porte du chasteau, mais ceste cholere fut bien tost passées, & ne

dura guerre, aussi ne fit-il cela qu'amuser sous ce pretexte, les pauvres princes massacrez, & aultres qu'ils estoient en lieu de toute assurance.

Neantmoins beaucoup d'aduertissemens furent donnez audit Seigneur de Guyse, monseigneur le reuerendissime Cardinal son frere, monseigneur d'Albeuf que aultres, de la traison que ce traistre par son hypocrisie accoustumee leur brasloit & de plusieurs & diuers endroits, voire mesme de la part de ceux qui auoient esté à la resolution, prise de ce meurtre par ce tyran, & estoient ces aduertissemens tant certains, que le conseil sur ce differant, fut tenu en la maison dudit seigneur, s'il se debuoit retirer ou non, quatre furent d'avis, qu'il se debuoit retirer, mais le seigneur Primat de Lyõ, homme de grãde science & par le conseil, duquel ledict seigneur de Guyse remettait la pluspart de ses volontez, remontra la playe qu'il feroit, que se retirant il s'acqueroit le blasme de perturbateur du repos public, qu'il desbaucheroit toute l'assemblee, qui quasi n'y estoit allee que sous son aile, & puis dit-il mon Seigneur, on dit communement qui quitte la partie la perd, pource, ce bon Prince interrompant, ledict sieur Primat luy dit. C'a tousiours esté ma resolution, de plustost cent & cent fois mourir que d'encourir aucune mauuaise opinion ny estre cause de desbaucher vne telle assemblee, & quand

raurois cent vies, librement ie les donnerois pour moyenner quelque repos à ce pauvre peuple tant affligé: d'autant que me retirant il faudroit tenir la campagne, qui seroit à la foudre d'iceluy. Ioinct aussi que ie ne croyray iamais, & ne m'entrera en l'ame que le Roy qui est si bon Prince, voulust executer vn si lasche tour cōtre ceux qui iamais ne l'ont offensé, & ne luy furent oncques que tres-fidelles seruiteurs & vassaux; & ainsi ce magnanime Prince trop confiant, resolut de plustost mourir que de se retirer, & voir les affaires defaistrees & descousues par son absence.

Le iedy vingt & deuxiesme Decembre, sur les dix à vnze heures de nuict, mō seigneur D'allebeuf qui estoit logé dedās le Chasteau, fut trouuer mondit Seigneur de Guyse en sa chambre, luy faisant entendre, que quelques vns de ses amys l'auoient aduerty, & estoit chose tres-certaine, que l'on vouloit attenter à leurs personnes, & qu'il y auisast: Ce bon Prince luy répliqua, qu'il debuoit considerer qu'il y auoit des perturbateurs du repos du Roy & de son peuple: que s'estoyent personnes qui portoyent enuie à l'heur qui viendrait à la pauvre France, par la resolution saincte des Estats, dont ils estoient près de receuoir les fruits, & que s'il estoit besoin d'y perdre la vie, c'estoit chose à quoy ja il estoit fort resolu, voire que quand il en auroit cēt il les voueroit tousiours au seruice de

Dieu, & de son Eglise, & soulagement du pauvre peuple, duquel il auoit grādissime pitié, & qu'il ne failloit abandonner ceste assemblée, qu'il ne fust deschargé: d'ailleurs, que le Roy estoit vn bon Prince, humain & plein de pieté, que veu les belles demonstrations qu'il leur faisoit d'vne si singuliere amitié, qu'il n'estoit pas croyable qu'il voulust seulement penser à leur brasser mal: Ioinct aussi les protestations & sermens solempnels iurez, sur le saint Sacrement, comme dit à esté cy dessus: ce bon Prince qui iusques à lors auoit escrit dans son liēt quelques expéditions, frapans de sa main l'estomach dudit sieur d'Albeuf, luy dit en riant, va te coucher cousin, puis comme affermant, mist sa main sur sa poitrine, disant: voyla le pourpoint d'innocence, & ainsi se departirent ces Princes, que si ainsi eust esté, comme le tyran, ses fauteurs, pollitiques, heretiques, & atheystes, disent que ledict sieur eust voulu attenter quelque chose cōtre ce malheureux, il n'y fust pas allé nud, desarmé, & desnüé de ses forces: ny mené à la boucherie, sa mere, sa femme, son fils, ses freres & cousins: qui est vn apparent & plus qu'asseuré tesmoignage de son innocence, d'autant que, comme dit l'Escripture: *qui ambulat simpliciter ambulat confidenter.*

Le lendemain vendredy vingt & troisieme Decembre, ce traistre faict venir & assembler ses maudits & malheureux Conseillers, dés

quatre heures du matin, ausquels resoluëment il dit: qu'il faut que ces bons Princes meurēt, & pource, fit enfermer ses assassins en son cabinet, chose de tout temps inaudite, qui sera Dieu aydant, le taureau de Phalaris, mourant au supplice de sa premiere inuention: & que Dieu permettra que comme il a ouuert la porte de son cabinet, qui luy debuoit estre la chose la plus particuliere, & recommandable, elle sera ouuerte à ceux de sa propre ruïne, & comme elle a seruy de couuerture & embuscade aux assassinateurs, pour opprimer les iustes, seruira de rempart aux executeurs de la iuste vengeance, pour y punir ce meschant, en cedit cabinet, furent ces iudaïstes avec ce iudas, depuis les cinq heures, iusques au iour, sans clarté n'y chandelle.

Sur les sept heures on enuoye querir mondit seigneur de Guyse, monsieur le grād Prieur, par le cōmandemēt du tyran auoit dès le ieu- dy fait partie avec mō seigneur de Ginnuille, lequel il enuoye querir en sa chābre, & de fait l'al- la incōtinent trouuer: vn autre & secōd messa- ger est enuoyé, de la part de ce traistre effemi- né, vers ledit Seigneur de Guyse, qu'il prie de se- haster, disant: que le Roy estoit pressé, par ce qu'il vouloit aller dīner à Clery, où il fai- gnoit aller passer ces festes de Noël: ou vous noterez s'il vous plaist, cōme ce meschant c'est tousiours masqué de la deuotion pour exer- cer & executer ces abominables meschācerez.

Ce debonnaire Prince, n'ayant à grand peine le loisir de s'attacher comme vn pauvre Isaac tres-obeyssant, sort pour obeyr à la volonté de ce cruel, & hors qu'il fut de sa chambre, dit ces mots, ie n'ay iamais accoustumé de sortir de mon cabinet sans premierement auoir prié Dieu, & ne me souuient d'y auoir iamais failly, dont ie sens en mon ame vn extrême regret & d'estre ainsi pressé, or estant ce magnanime Prince : à l'entree de la sale du tiran où estoient assemblez les meschants, le maudit & pernicious conseil, & ayant regardé de costé & d'autre, les archers des gardes de la compagnie de Larchant qui estoient dans ladicte salle, commença à leur dire: pourquoy mes amys estes vous icy, c'est vne chose non accoustumee & extraordinaire, & n'a iamais esté veu que vous soyez icy le conseil tenant: Larchant ioüant l'vn des plus principaux personnages de ceste tragedie, s'approcha de ce bon Prince, & luy dit: monseigneur ces pauvres gens m'ont prié de supplier le conseil qu'il demeurassét icy iusques a ce q̃ sa Majesté y soit venue pour luy faire entendre que si elle ny donne ordre, ilz seront contraincts de vendre leurs chevaux pour eux en retourner a pied, d'autant qu'ils ont sollicité les vns & les autres, qui leur font responce qu'il n'y a pas vn sol pour eux, & ce pendant ils sont dans quatre ou cinq iours hors de leur quartier.

Ce bon Prince luy respond humainement, monsieur de Larchant ie leur seruiray & à vous de tout mon pouuoir, il est bien raisonnable qu'on y dōne ordre, que si ces traistres n'eussent perdu tout iugement & toute raison, ces parolles tant humaines & affables estoient suffisantes pour aux plus endurcis, faire tomber les armes des mains: mais iamais le meschant & reprouué pour quelque chose que ce soit, ny le vilain ne peut estre gaigné par l'honnesteté.

Sur les sept heures, & demye monseigneur le Cardinal de Guyse, logé hors du chasteau est enuoyé querir par le Merle, maistre d'hôtel.

Monseigneur de Guyse, ce pendant s'assist avec les traistres susdits, lors Larchant commença à proposer le faict de ces satellites. Marcel faisant bonne mine se leue, disant: qu'il y auoit vne partie de douze cēs escus pour eux. Larchant replique que cela n'estoit rien, sur ces propos ce pauvre prince qui estoit subiect à vn mal de cœur prist dedans ses chausses, vne petite boiste d'argent, pour y pāser trouuer quelques raisins, & n'y trouuant rien māda à saint Prix, premier valet de chambre de ce tyran, qu'il luy enuoyast quelques bagatelles du Roy, ce sont les mesmes mots de ce prince, saint Prix sur le champ luy apportz quatre prunes de brugnelles, desquelles il en mangea vne, & les trois aultres, les mist

dedans sadiete boiste, à mesme temps, parce que l'œil de son honorable playe pleuroit, chercha vn mouchoir & n'en trouuant point dans ses chausses, il dit ses mots, mes gens ne m'ont pas baillé aujourd'huy mes necessitez, mais ils sont excusables, pource qu'ils ont esté trop hastez, & voyant monsieur Othemant, thresorier de l'espargne pres de luy, il luy dit, monsieur le thresorier, vous plairoit-il prendre la peine de voir à ceste porte s'il y a quelque page où laquais, à moy, & luy commander qu'il m'aille querir vn mouchoir, les archers refuserent laisser sortir ledit Othemā, mais ledit Larchant craignant d'estre descouuert, leur fit signe de le laisser sortir & ledict saint Prix auerty que cedit prince auoit besoin de mouchoir, incontinent luy en apporta vn.

Au mesme instant huit heures sonnent, ce fut lors que ce desloial, perfide & cruel tyran, commanda à Reuolt, qui estoit dedas le cabinet, qu'il allast querir monseigneur de Guyse, ledit Reuolt est refusé par Nēbu huissier de la chambre, qu'il ne le veut laisser sortir, disant que le Roy luy auoit deffendu, de ne laisser entrer ny sortir, homme viuant, sans son expres commandement. Alors Reuolt retourne audit cabinet, le dire au tyran qui mande incontinent ledit Nambu, auquel il commande de laisser sortir ledit Reuolt, mais qu'il ne laisse entrer que ledit seigneur de Guyse, se Reuolt estoit

uolt estoit au parauant secretaire, & valet de chambre de ce môstrueux, & detestable d'Espernon, lequel ce miserable tyran en chassant les secretaires gens de bien, l'auoit choisy propre pour vne tant horrible & execrable trahison.

Sorty qu'il est, va au Prince assis au conseil de ses meschans, luy dit que le Roy le demandoit, aussi tost ce Prince part, faisant à ceste canaille vne grande reuerence & entrant dedans la maudite chambre, en laquelle estoit l'execrable cabinet, tenant son chapeau d'une main, & tenant la tapisserie de la porte dudit cabinet de l'autre, estant panché pour y entrer d'autant que ladiete porte estoit fort basse, six coquins de ses quarante cinq diables, coupe-iarets, & assassinateurs gascons, vermines & la ruine totale de la France, les vns luy faisoient les deux bras, aultres luy tirent son espee & poignard, vn luy lance vn coup de poignard dans la gorge, aultres de grands coups de dagasses qu'ils auoient nues sous leurs manteaux, vn grand borgne d'entre eux se iete sur ces espaulles luy serrant la gorge de ces bourelles mains, en le tirât par derriere, & aultres pour le faire tomber se ietterent à ses pieds.

Le Gast que ce Prince bening tira du danger sanglant en luy sauuant la vie, & à toute sa compagnie, le iour des barricades, iour ôtres-debonnaires Parisiens, tres-heureux au-

quel Dieu auoit mis tous vos ennemys en vos mains, si vous eussiez pris & vsé de l'occasion pendant qu'elle s'offrit, & si vous l'eussiez bien sçeu entendre, mais le seul respect & amour violent que portiez à ce prince, aresta l'execution de vostre iuste fureur, & ingrats, mal-heureux tuent & massacrent inhumainement, & cruellement l'auteur & conseruateur de leur chetive vie, car ce Gast estoit de la compagnie desdicts assassinateurs, & dit-on que la Bastide fut le premier diable qui donna le premier coup, on tient aussi qu'un borgne tapissier de la chambre, les assista. Ce Prince inuincible en generosité qui en plein camp eust esgorgé dix milles tels coquins ayant simplement secoüé ses bras en renuersa quatre par terre, & apres s'estre long temps combatu à coups de poin, en fin est terrassé par ces bourreaux, & tombant comme celuy qui auoit son principal appuy & intention premiere, en Dieu cria, mō Dieu ayez pitié de moy, cela dit: ietta le pan de son manteau sur sō visage pour mieux mediter au ciel, & est chose remarquable que ce bon Prince alla tōber aux pieds du liēt du tyran, & a laissé les marques de son precieux sang, à la couche de ce miserable, lequel avec plusieurs coquins comme luy, estoit en son cabiner regardant ceste tragedie, armé iusques aux dēts, la porte entr'ouuerte: & voyant ce pauvre Prince ainsi par ces meurtriers abbatu, com.

menda à Fōtaine lors varlet de garderobe de voir si ce pauvre Prince estoit mort, lequel prompt au commandement, sortit dudit cabinet, & approcha ce Prince, & ayant destourné la pan de sondit menteau, en luy tastât les leures de sa main, cōme estat ce pauvre Prince aux aboix souspirs & sanglots derniers de la mort, rendant son ame à Dieu, remua vn peu la teste, ce qu'estant rapporté au tyran, sort de sondit cabinet, l'espee nüe au poin, aborde ce corps, ia transsi, & d'vne voix trāsportee, & action pire que celle d'vn demoniacle, frappant du pied sur l'estomach, sur la gorge, & sur la face de ce pauvre Prince, luy disoit: nous ne sommes plus deux, ie suis Roy maintenant, & disant ces mots, ce polt on luy lança vn coup d'estoc au trauers du corps, & commenda à Longnac l'vn des deux nouveaux mignons, & bougre de ce cruel Sodomite nouvelles mousches, & sangsues du pauvre peuple, faire le semblable, ce qui n'est pas plustost commandé qu'aussi tost il est executé sur ce pauvre corps ia mort, lequel apres fut laissé à terre, & vn meschant tappis ietté sur luy.

Voilà l'abominable & detestable executiō, & la moisson des fruits que l'on peut esperer, recueillir de ce maudit Henry, ateiste & parricide qui pariure traistreusement, couiardement, & laschemēt, faict par des coquins & belistres, assassiner, & meutrir le soustien, le pillier & l'ap-

puy, de la S. Religiō, de son Estat, de luy-mesme, de sa courōne, & de toute la Frāce, qui par ses prouesses, forces, vaillantises & vertus, se rendoit redoutable, & espouuentable à toutes les plus puissantes, robustes, & belliqueuses nations. O Frāce de quels honneurs, de quelle loüange, de quels marbres, ioyaux, & pierres plus precieuses, pourras-tu enrichir son tombeau eternisant par ce dernier debuoir, la memoire de celuy qui viuant ne viuoit que pour toy, & mourant n'aspiroit qu'à ton repos. Le tombeau le plus honorable que tu peux eriger à ce saint martyr est que tu imite sa pieté, sa constance, & ceste sainte resolution de mourir en la conseruation de la religion pour la liberté de ta nation & repos de ta patrie, pour ce saint zele estre graué, & demeuré eternellement en la meilleure partie & signalé endroit des cœurs de tous les vrayz & naturels François & plus gens de bien.

Ce corps ainsi estendu fut par les malings assez mocqué, mais comme entre les mauuaises herbes s'en rencontre quelques vnes bonnes & salubres, ainsi entre les meschāts, se trouue quelque homme de bien au milieu de ceste fureur & plus speciale cruaulté à la face de ce tyran ou luy bien pres en presence des assassins se rencontra Dorguin aumosnier dudit tyran, qui voyant ce corps ainsi meurtry, la larme à l'œil soupirant, dit: c'est grand pitié, d'ainsi mal-heureusement massacrer

les Princes, puis dit vn De'profondis, dont plusieurs ont beaucoup, plus loué ceste assurance de prier dudit Dorguin, en vn peril si eminent, au millieu des bourreaux, que la froide taciturnité d'aucuns, craignāt les cousteaux.

Monseigneur le Cardinal de Guy se, qui auoit entendu le cry de Monseigneur son frere, lors qu'il tomba par terre, se leua du conseil ou il estoit proche de la chambre meurtriere, s'escriant, dit: ha, mon Dieu, voyla mon pauvre frere que l'on massacre: & pensant aller au secours, fut empesché par le Marechal de Rets, lequel sans respect de son sang, de sa robe, & de sa qualité tira son espee, & luy meist la poincte, contre la poitrine, iurant que s'il bougeoit qu'il estoit mort.

Après ceste iniure receüe il est mandé par le tyran, & mené par les satellites d'iceluy, qui pour le plus outrer & combler de douleur, le firent passer dedans la chambre & par dessus le corps dudit seigneur son frere, mort, & tāt inhumainement massacré, ce fut le secōd acte du martyre de ce braue Prelat, qui de long temps resolu en Dieu, & se deffiant à iuste raison de ce traistre ateyste, auoit quitié ceste habitation terrestre, quant à l'esprit, & contemnē tout ce que la cruauté des traistres & malheureux tyrans, pourroyent contre luy exercer, il estoit en ceste prise accompagné de

monſieur le Primat de Lyon, & euſſiez lors
veu repréſenter au vray la ſaincte hiſtoire de
Sixte & ſainct Laurent, ou de Valere, ou ſaint
Vincent: tant conſtamment ces Seigneurs, al-
loyent priſonniers, contemnant & meſpriſant
les menaces de ſe ſecond Decius, & villain
Herode, qui enſemble les fit mener en pri-
ſon.

Au meſme temps enuoya Clermont, d'An-
tragues, Chateauuieux, & Larchant: ſe ſaiſir
des perſonnes de monſeigneur le Cardinal de
Bourbon, Madame de Nemours, de meſſieurs
de Nemours, d'Albœuf, & Ginuile.

Le grãd preuoft eſt auſſi toſt enuoyé à l'ho-
ſtel de la ville, ou eſtoient meſſieurs les depu-
tez du tiers Eſtat, & entrant en la ſalle, accom-
pagné de ſes ſatelites, l'eſpee nue au poin, dit
ainſi: ie viens de la part du Roy vous faire en-
tendre qu'il veut que vous continuez vos
charges, mais pourceque l'on luy à voulu dō-
ner vn coup de dague dedans ſa chambre, il
vous commande à vous monſieur le Preuoft
des Marchans de Paris, le Preſident de Neul-
ly, Compent, & Lieutenant d'Amiens, de le
venir trouuer, car on luy a fait entendre, que
vous eſtes de la conſpiration, ie vous commē-
de de me ſuyure pour luy en rendre raiſon:
voyla la belle couleur, le menſonge, la belle
apparence & les beaux pretextes, que priſt ce
meſchant, marque & poinct ſuffiſant pour
iamais ne croire tel menteur, & rembarer tous

les mensonges, duquel luy & les siens se voudroient ayder, & courir cy apres, ainsi cestant honnestes & vertueux seigneurs, sont menez à l'œil, à la veüe & a la face de tous les Estats assistans, comme meurtriers: ou compagnons de meurtriers, deuant les meschants comme Iesus Christ deuant Cai- phe & Pilate, on les faict entrer en la chambre dudit massacre, ou estant, apperceurent le sang du Prince martyrisé, & s'estant enquesté, monsieur le Preuost des Marchans de ce que ce pouuoit estre, l'un des enfans du pere, de mésonge, ennemy de toute verité, luy dit que c'estoit vne bouteille de vin espandue, à la verité, malheureux tu ne pensois pas si bien dire, car c'estoit vne bouteille de vin, le plus exquis & excellent qui eust peu iamais estre respandu, & duquel à limitation des anciens, en pensiez tirer vostre ioye. Mais le grand Dieu iuste vangeur des iniquitez des meschants, fera changer ce vin en sel respandu, qui sera le vray augure & prophete plus veritable de vostre tristesse, & douleur.

Vn aultre s'approchant dudit sieur, Preuost voyant que de plus pres il le regardoit, & iugeoit que pour le certain c'estoit du sang luy dit ne l'avez vous point veu, ledit sieur Preuost luy respond, qui l'autre replique, Monsieur de Guyse, il n'est pas à trois pas de vous tout roide mort en ceste ruelle (monstrant le liect du traistre Henry) il est couuert d'un vieil

rappis, lors ledit sieur Preuost s'aprocha de monsieue le president de Neully, & luy dit monsieur nous sommes morts, ils ont assassiné ce bon Prince, ce disant: le tyran commanda qu'ils fussent menez prisonniers, en vn viel galatas, que ce traistre auoit fait faire express pendant les Estats au dessus de sa garderobe, ou c'est hermite fardé faingnoit vouloir mettre des fueillants. Vous voyez comme ce cinge Iulian apostatisé se couure tousiours du voile de deuotion, & de religion: pour seruir de fart & d'apast à les cruelles trahisons: & de pieté, pour assouir ces villains malheureux & horribles desseins.

Après ceste tant poltronne execution acte veritablement digne de ce barbare incensé, Il va trouuer la Royne sa mere, luy disant: qu'il estoit Roy maintenant, & qu'il auoit massacré son compagnon, laquelle (à ce que l'ô dit) n'eut gueres agreable ces nouuelles, ains qu'après luy auoir dit mille pouilles, & prophetisé tous les malheurs, qui pour ceste assassinaist estoiet ja pres à tomber sur sa teste, & demandé s'il auoit bien mis ordre à ses affaires, d'autant que monsieur de Guyse auoit beaucoup d'amys, & ayant ce folastre (despourueu de tout sens) respondu que ouy, se saisit de telle façon, qu'elle se mist au lit d'où elle n'a depuis releué, ce fol incensé estoit si ioyeux de ceste execution, qu'il en dist autant à vn garçon de sa chambre nomme Macé.

Toutes

Toutes ces choses furent entierement executees sur les dix heures, & fut ce malheureux si impudent que d'aller publiquement à la Messe, sa traistre face riant, comme s'il eust conquis toute la Monarchie du monde, après le disner, il s'esgayoit & prenoit son plaisir à contempler ce corps massacré, avec tous ses mygnons, sangsuës & autres ennemys du bien public.

Par ce que dessus vous avez peu entendre, que ce tyran redoutoit tant la velleur & generosité de ce magnanime Prince, qu'il s'estoit basti trois escadrons de bourreaux, à sçauoir les Archers de ses gardes à la salle où se tenoit le Conseil, & les quarante cinq meurtriers coupe-iarets dedans la chambre, le troisieme estoit dedans le Cabinet, ou estoit ce traistre armé, comme dit à esté, accompagné entre aultres du Comte de Soissons, d'Antragues, d'Antraguier, & Clermont, d'Antragues freres, Alphonse Corces, d'Empierre, & plusieurs aultres que vn certain personnage qui les à veu, ne peut bonnement recongnostre, parce que comme dit à esté, ils n'auoiēt point de clarté, mais luy qui estoit en vne petite chābre, proche du cabinet, entre autres remarqua tous ceux là, & de faict, ledict d'Antragues enuiron sur les six heures, alla dans la dicte chambre ou estoit ce personnage, & luy dit. Monsieur priez Dieu qu'il donne la force au Roy de pouuoir executer vne bonne entre-

prise dont il espere venir à bout pendant vne heure, ce que s'il luy plaist permettre la France, & nous tous serons trop heureux. Le Roy vous le commande, & moy ie vous en supplie bien fort, icy est le prouerbe biē aueré qui dit, a tel maistré tel valet. Ce miserable Henry (ingrat du bienfaict & bons seruices de ce rāt signalé seigneur) c'est serui de ce traistre D'atrague, lequel aussi oubliant les benefices & courtoisies qu'il auoit receües de ce Prince, s'est rendu enttemetteur des actes de ceste trahison, ha malheureux recognois tu ainsi celuy à qui tu estois tant subiect tu est de ceux desquels parle le Prophete Royal, *Qui retribuunt mala pro bonis.*

Monseigneur le reuerendissime Cardinal de Guyse emprisonné comme auez entēdu avec monsieur le Primat de Lion, comme par vne particuliere reuelation & assure aduertissement de la part de Dieu se disposa à la mort & de fait, se confessa audit sieur, Primat de Lyon, luy declarant toutes ses plus secretes & particulieres affaires, ausquelles il entendoit que sur sa relation, on satisfist selon ce que ledit Sieur le feroit entēdre reuenāt en liberté. Ce faict ledit sieur Primat soit d'ennuy où aultremēt ne se peut, le soir estāt venu garder de dormir, & s'estoit couché sur vne pailasse, que ce tyran plustost par derision que de pitié, auoit permis estre portee à ces pauures seigneurs.

Ledit sieur Cardinal, qui depuis l'heure de sa confession, n'auoit fait que les genoux en terre reclaimer la misericorde de Dieu, & prier tres-instamment voyant comme ledit sieur Primat dormoit profondement, l'excita comme vn secōd Iesus Christ, disant commēt Mōsieur de Lyon dormez vous en telles affaires, nous auons besoin de prier, & ainsi esueillé, ils passerent le reste de la nuit à mediter, & tousiours ledit reuerēdissime les genoux en terre, iusques à tant que les bourreaux le vindrent leuer. Car pendant que ce saint Prelat inuoquoit le nom de Dieu, les traistres & meschans escoutoient la suggestion du diable. Henry l'hermite mist le lendemain matin vigille de Noel, en deliberation, si ledit sieur Cardinal debuoit mourir ou non (apres que Ramboüillet Euesque du Mans, estant comme vn Iudas, sorti du conseil des deputez, le fut aduertir de la resolutiō prise desdits deputez, qui estoit de l'aller trouuer pour le prier de deliurer ledit seigneur Cardinal) la fut par ces iniques aresté, que ledit Seigneur mourroit, & qu'il failloit preuenir la priere desdits deputez, qui fut à la verité trop tardifue car ou ils se debuoiēt faire emprisonner avec luy qui estoit leur President, & mourir plustost ou le retirer.

Et pource ce monstre sortant de son cabinet fauxbourg de l'enfer sur les neuf à dix heures commanda à ses cruels satalittes d'aller mas-

sacrer ce Prince, prince du sãg cõme dit est, Cardinal, Archeuesque, prestre saint & sacré. Ce commandement se trouua tant enorme, & estrange, à ces mesmes bourreaux, coupes-iarets qui ja s'estoient au parauant ensanglantez & souillez au sãg de mōseigneur le Duc de Guyse, que ou pour la reuerence qu'ils portoient à la robe pourpree de Iesus Christ, où la terreur d'un si innaudit acte, ou le remors qui boureloit leur conscience d'un si execrable forfait premieremēt commis, les empescha & refuserēt tout a plar, d'executer ce cõmandement, pource fut contraint ce Neron, d'y employer d'autres soldats des gardes, on dit que ce fut des Escossoises, autres, que ce furent coquins & belistres gaignez a pris d'argent, telz qu'ils fissent cest acte, tant indigne monstre bien que plustost ils estoient endiablez de Iean le diable de Nogarets, ioüant ces diableries par l'hermite Henry.

Ces diables donc ainsi enuoyez, vont au galatas où estoit ce bon Prince, qui encorē estāt à genoux, comme vous auez entendu: ayant ouy le bruit de ses meschans, venant avec impetuosité, se leue alors, & embrassant doucement mōdit sieur le Primat de Lyon, luy dit: monsieur voicy l'heure qu'il faut que ie meure, priez Dieu pour moy, & il me fera la grace de le prier pour vous: ie vous puis asseurer que ie ne suis point marry de mourir, pour le desir & creance que i'ay que ces deux cœurs,

de mon frere, & le mien, qui ont tellement esté conioincts & vnies en ce monde, d'une sainte fraternelle & estroite amitié, seront beaucoup plus parfaictement liez ensemble, par l'estroit lien de la charité de Dieu, ayant nos cœurs esté tels. que ny les effroicts, ny la pœur de la mort, les vrayz aduertissemēts qui nous ont esté donnez de la meschante & deprauee volonté, que l'on nous portoit, ne nous ont peu faire quitter la place. pour le bié du public, ny separer nos corps l'un de l'autre: puis s'agenouillant ce saint Prelat luy dit, mon pere, ie vous prie encore, me donner vostre benediction, ce qu'ayant fait, les bourreaux entrerent, & trouuerent ce Prelat encore à genoux, qui sans regarder ces meschants, ne leur dire vn seul mot, se leua, & par plusieurs foys, embrassa ledict sieur de Lyō qui d'un si pireux spectacle, se consommait en l'armes, & au contraire ledit sieur Cardinal, tres constant, le consolait & le baissant luy donna le dernier adieu, & lors ces meurtriers, & maudits, sans ame, & sans Dieu, plus cruels que les tygres ou enragez Lyons, & moins sensibles que les plus durs rochers, avec rudes paroles, en se mocquant de luy, luy dirent Cardinal il faut mourir, & le prenant luy mirent vn cordeau au col, & le tirent dehors, & le menerent au lieu du malheureux massacre: mais plustost lieu de son tres-heureux martyre, & porte par laquelle

il pouuoit glorieusement entrer au ciel, ces affamez de butin estimant le dommage plus grand, de gaster la robe que de meurtrir le corps, ainsi que les malheureux qui crucifierēt Iesus Christ, ne voulurent rompre sa robe; ains la conseruerent entiere. Ainsi font ces cruels, luy ostant sa robe de pœur de la gaster des coups meurtriers qui luy alloient donner, pardonnant plustost à la robe que non pas au corps sacré. Ce Prince agenouillé contre vne muraille auquel à grand peine permirent-il dire vne seule oraison, & icelle finie, se couure de ses mains recommandant son ame à Dieu ces pēdars, bourreaux a l'instant tirant le cordeau que ja ils luy auoient mis au col, luy lancent plusieurs coups de poignards, & d'allegardes au trauers de son sacré corps, le massacrerent ainsi, & firent mourir, voyla l'acte inique & genereux de ce poltron effeminé, qui pariure faulxant la foy publique, violant le droit des gens, en vn lieu si saint & sacré, lieu tenu de tous peuples quoy que barbares pour tres asseuré, & où vn chacun doit estre en plus grande liberté, & assurance qu'en sa propre maison, commis à la face de tous ses Estats, apres tant de iuremens solennels, tant par Edicts, que sur le saint Sacrement de l'Autel, a si inhumainement & cruellement meurtry assassiné & emprisonné les premiers esleus ausdicts Estats, que si, ô meschant, tu es homme où est ton

humanité, s'ils n'estoient parens, ou est le s^g,
 si tu estois Roy ou est ta iustice : De là nous
 pouuons conclure & iuger, quel respect ce
 Sardanapale porte à l'Eglise, & l'amitié qu'il
 porte à son peuple, n'ayant iamais rendu qu'à
 la ruine de l'un & de l'autre. Iusques à quant
 donc ô Chrestiens François, perdrez vous le
 premier courage, duquel par toutes les natiōs
 les plus estrangeres & eslongnez, on vous al-
 loit vantant, iusques à quant subirez vous le
 ioug, d'un si lasche ateyste, qui iamais ne fut
 vostre, iamais ne fut François, ny né de sang
 Royal: mais biē quelque bastard, ou quelque
 desrobé introduit parmy vous prodigieuse-
 ment, ou vn diable incarné, pour seruir de
 bourreau, & estre le fleau de la iustice de Dieu,
 iustement irrité pour nos fautes, que s'il luy
 plaist, auēc vn amendement sainct d'icelles, il
 vous ouurira les yeux a ce que iamais vous ne
 vous fiez, ny recognoissiez, en quelque sorte
 que ce soit vn tel meurtrier, tyran, ennemy
 de son nom, de son Eglise, & de son peuple:
 c'est la resolution qu'il faut que vous preniez,
 parlez à l'heretique, il l'a en horreur, les estrā-
 gers l'abhorrent, les gens de bien le dete-
 stent.

Cest enragé, n'est satisfait de ces meurtres
 sanglāts, & n'est contēt si plus ouuertemēt il
 ne mōstre sa rage: car ce bō hypocrite & tāt re-
 ligieux cafard, porta tel sainct respect à la S. Na-
 tuité de Iesus Christ que la nuit du Samedy vi-

gille de Noël, pēdant que l'on disoit les matines & la messe, fit par ces bourreaux decouper & detrancher les corps, de ces deux pauvres Princes freres martirs, apres s'en estre bien mocqué & reserué les testes, disant que l'une seruiroit d'espouuantail aux habitants de la ville d'Orleans, la mettant sur l'une de leur porte, & l'autre de creue cœur, d'effroy, & de terreur aux gens de bien de Paris, la mettant sur l'une des portes de ladicte ville, & les morceaux des ces corps innocens ainsi hachez les fit brusler par lesdits bourreaux, & tourne broche de sa cuisine sous la salle, ou se tenoit le conseil luy present, & fit apres ietter la cendre au vent, plus continuant en ceste rage fit deffendre à toutes personnes de ne prier pour eux, ny mesmes de parler de ces Princes deffuncts, pensant ce fol par là, estaindre la memoire de ceux qui comme dit le sage, viuront eternellement, car en despit de luy il ne se peult lire ne remarquer par tous les liures, & discours des anciē, que la memoire & souuenance de quelques Roys, depuis que la Monarchie est en France, ayt esté plus honoree, quelques commandements que l'on puisse auoir faict, que celle de ces deux Princes, & où les seruices & recommandations aye esté plus solemnellement celebrez tant à Paris qu'autres lieux pour rendre l'honneur, & la recognoissance deuë apres la mort à ces Princes.

Le lendemain ce Iudas non seulement possedé d'un

sedé d'un diable, mais de plus de cent mille legions de diables : osa temerairement approcher de la table de Iesus Christ, ses mains encore toutes sanglantes, faisant ainsi compaignon le iuste des iustes de son iniustice, le saint des saints de sa meschanceté, & iniquité, le Dieu des dieux de tous les diables qui possèdent & tiennent son corps.

Sur les cinq heures du soir, du Dimanche iour de Noël, les depputez d'Orleans vindrēt vers luy, le supplyent tres-humblement les recepuoir comme ces tres-humbles & tres-obeyssants suiects, & qu'il pleust à sa Majesté, leur donner vn autre Gouverneur, que ce perfide, traistre, & desloyal, d'Antragues, ensemble faire razer la citadelle, pour les raisons qu'ils luy deduirent bien au long, mais le traistre monstra biē par sa responce que de long temps il auoit pourpésé ce forfait, d'autant qu'au precedent le meurtre, il auoit enuoyé dans ladicte ville plusieurs coquins & belistres, aussi meschans & de pareille humeur que ledit d'Antragues, qui faisoient ja infiniz indignitez aux habitans, & pource leur dit fierement, avec vne mine refrongnee & pleine de courroux, vous n'aurez point d'autre Gouverneur que d'Antragues, auquel ie veux que vous obeyssiez, & la Cytadelle ne sera point abatuë, au reste retournez à vos concitoyens, & leur dictes, que si dans vingt quatre heures, ils ne me rendent ma ville, ie

vous enuoyray assieger, & feray passer au fil
 de l'espee, iusques aux femmes, & petits en-
 fans du berceau, & ainsi renuoya ses deputez
 qu'ils ne sont plustost partis, qu'au mesme in-
 stant le iour de Lundy feste de S. Estienne apres
 disner, il enuoya le grand Prieur, le Mareschal
 d'Aumont, Bellegarde & Longnac, reiectons
 du galeux, & podagre d'Espernon, avec leurs
 satellites, pour assieger ses bons resolu, &
 tres-affectiōnez à la religion messieurs d'Or-
 leans. Cipierre estoit de leur bande, duquel au
 parauant que partir, estans dans l'antichambre
 de la Roynne demāda à Grandmont, & Lelude
 damoifelles de ladicte dame quelque faueur
 pour luy seruir de phare, de guide & de bon
 heur en vn si vertueux exploit. Ladicte Lude
 subitemēt luy mist vn chappellet au col, pour
 ses faueurs, luy en colere l'arrachant luy dit,
 ie n'en veux pas porter, car monsieur de Guy-
 se en portoit. Iugez maintenant en quels ter-
 mes nous sommes & que veult dire cela, si-
 non comme ils ont accoustumē de dire qu'ils
 sont de la religion du Roy qui iamais n'en eut,
 aussi n'en ont ils poinct, mais Dieu permit que
 monsieur le Cheualier breton fut plustost à
 Orleans, & deuança ces Antragues iudas qui
 alloient en intention de les surprendre, & eu-
 rent loisir de se recongnoistre & prendre vne
 sainte & ferme resolution de tous viure &
 mourir pour l'hōneur de Dieu, pour la cōser-

uation de leur religion, de leur vie & de leur ville.

Les vertueux citoyens sont assiegez, & dedās & dehors, mais ils ne perdent pourtant le courage, ains brusquement & virillement, ils resistent à l'ennemy qui les presse de tous costez, & par la citadelle que le traistre auoit réplie de meschants, comme dit est, & par dehors du siege des susnommez. Ce qui veritablement peut seruir de patrō, d'exemplaire, de miroüer, & de constance & fermeré à toutes les autres villes, de ce royaume rassembler & fortifier contre ce miserable, & les siens oppugneurs de la religion, tranquillité, & repos du pauvre peuple.

Dés aussi tost que les nouvelles furent venues à Paris du faict, monsieur le Cheualier d'Aumalle partit hastiuement, & alla vertueusement secourir lesdicts assiegez où il a faict beaucoup pour nous.

Ces massacres & assassina ts ainsi perpetrez, & executez, ce tyran menteur, fit courir le bruiet, qu'il n'auoit rien fait que suyuant l'aduis de monsieur le Duc du Mayne, frere des martyrs, lequel il disoit luy auoir enuoyé Alphōse Corse, avec vne lettre signee de sa main, par laquelle ledit sieur du Mayne luy escript, qu'il prinst garde à soy, d'autant que les Princes massacrez ses freres, ensemble mōseigneur d'Albœuf, & de Nemours, auoiēt resoluz attendre à sa personne.

D'auantage, que madame d'Aumalle luy auoit monstre lettres, que luy auoit escriptes, monseigneur le Duc d'Aumalle, par lesquelles il luy mandoit comme il s'estoit trouué, non d'esprit, mais seulement de corps, en vn conseil, où il auoit esté conclud & arresté, que dorénuant, monsieur de Guyse feroit toutes choses, que la puissance du Roy feroit si petite, qu'il ne feroit plus rien qu'avec la volonté dudit sieur de Guyse, & qu'il seroit seulement Roy en chiffre, voyla les sotes & badines, mesonges, desquelles ce Sibilot regalisé vsoit pour couurir sa meschanceté : mais puisque ces seigneurs luy auoyent esté tant fidelles, que de l'auoir tant soigneusement aduerty, pourquoy enuoyoit-il ledict Alphonse Corle pour dagner monseigneur du Mayne, & Campagnolle, à Paris, auant le massacre, pour tuer monseigneur d'Aumalle : mais ce Dieu eternal, lequel reserua anciennement le petit, restât de la lignee Royale des mains de la cruelle Atalia, qui puis apres la fit iustement mourir, & chastier des meurtres & assassins commis par elle à l'endroit de ses freres, nous à reserué ces bons Princes pour faire le semblable contre ce tyran forcené, il fit aussi courir le bruit que le premier president de Paris, s'estoit emparé de toutes les places fortes de la dicte ville, & qu'il auoit faict baricader les ges de bien (ainsi appelloit il ces pollitiques) pour empescher les volleries de ceux de la ligue &

que ledit Presidēt estoit assisté dudit seigneur d'Aumale, ce bruiet continua iusques à ce que certains particuliers vindrent à Bloys, qui apporterent nouuelles toutes contraires.

L'occasion de toutes ces menteries, estoit pour intimider tant ceux de la ville d'Orleans que les depputez, qu'il auoit aupres de luy, tellement, qu'il sembloit ou qu'il les eust charmez, ou bien qu'ils fussent saisis d'une extreme crainte, donnant trop de creances à seldits mensonges. Vne chose c'est trouuee fort remarquable, & dignes de vrays & bons Religieux, car ce traistre voulāt aller à la messe en l'Eglise des Capussins, il ne se trouua Religieux qui voulut celebrer la Messe, ains luy remontrèrent tres-vertueusement, qu'il estoit excommunié, & incontinent apres, le laisserent là, ce saint zelle à esté trouué beaucoup meilleur que la conuiuencence de plusieurs gros Euesques, Abbez, & aultres depputez, qui ont acquis ceste reputation d'estre frappez du vent de la court. Quant à ce fardé & hypocrite Euesque du Mans, frere de Ramboüillet, & Maintenon, c'est chose tres-assuree, qu'il a esté vn des principaux conspirateurs & conseillers de ceste cruelle trahyson. L'Euesque de Paris n'est pas, en meilleur predicament, delaisant son troupeau pour s'adiointre & suyure ce meurtrier, auquel deuant ses yeux, il a veu faire tant de meschancetez,

encore dit-on que ç'à esté luy, qui aupres d'une chaire percee luy a donné l'absolution, il est aussi mal aisé que cest asne qui voulant flatter son maistre, luy brizoit a coups de pieds, les bras, l'estomach, & les iambes, ainsi cuidant flater le vice, il ruine non seulement le corps, mais ce qui est beaucoup plus precieux, assauoir l'ame, aussi est-il des mieux venus, il fut tant impudent depuis le massacre, qu'un bon Religieux chartreux s'estant retiré par deuers luy pour receuoir quelque consolation luy demanda, monsieur que pensez vous que die nostre saint pere le Pape, d'un acte tant indigne, il luy fit responce, il dira que le Roy a bien fait, & faut qu'il soit entierement obey en son Royaume, & pour vous tesmoigner, qu'il en iugera en ceste sorte ie vous aduise dit-il que moy estant à Romme lors des barricades, sa sainteté estant aduertie que monsieur de Guyse auoit empesché que le peuple n'executast sa furie, contre les soldats & gendarmes du Roy, & ceux de son conseil, il le loua fort de cest acte, mais depuis ayant entendu qu'il s'estoit emparé de la bastille, & du boys de Vincenne, il changea bien de langage, car dit ce beau Prelat, il y va de l'Estat, qui causa à ce bon Religieux, de redoubler ces larmes, desquelles il a reiterees depuis par plusieurs fois pour si meschantes parolles prononcee de la bouche d'un tel homme.

Voyla comme nous pouuons dire avec le

Prophete, que *maioribus iniquitas*: car si nous
 recherchons de pres la cause, & l'origine de
 nos malheurs, nous la trouuerons auoir touf-
 iours procedé, ou des premiers de l'Eglise,
 ou des premiers de la Iustice, les conuiuences
 des vns & des autres, qui ne s'estant opposez
 aux efforts de la premiere entree de ceste ry-
 rannie, nous ont tellement precipitez, qu'à
 grand peine est-il possible de nous en retirer,
 les accords trop prôpts & octroys de deci-
 mes, qu'au lieu de cinquante mille escus, la
 saincteté en auoit accordé cent mille, tant de
 verifications d'Edicts onereux, & preiudicia-
 ble au pauvre peuple, me sont preuues suffi-
 santes: & c'est grand pitié, que ceux qui de-
 uoyent embrasser nostre cause, & mourir plu-
 tost cét & cét fois en vn si sainct suiet, & bel-
 le occasion, & qu'ils debuoyent mettre toute
 leur affection en l'execution d'vne tât honora-
 ble confessiō ont esté les plus mornes, les plus
 frois, & les plus timides, & comme entre les
 Ecclesiastiques les plus pauvres ont esté les
 plus resolus, assauoir ces bons Religieux Ca-
 pussins, d'autant que lesdits Ecclesiastiques
 n'eurent la hardiesse ny le courage d'oser seu-
 lement dire vn Deprofondis, à la memoire des
 pauvres deffuncts, signamment de monsei-
 gneur le Cardinal leur president, ainsi entre
 les laïques ceux qui ont esté les plus reso-
 lus furent messieurs du tiers Estat, monsieur
 le Preuost des Marchans de Paris representant

iceux ne manqua iamaïs en sa charge, mais hardiment lateste leuee la face riante, tousiours, luy mesme ne s'est iamaïs estonné ne changé de couleur quelque menace, quelque prison, quelque terreur que l'on luy ayt peu représenter, ains à seruy de consolateur, & d'un vray exemplaire, muni d'une admirable patience, aux emprisonnez, & iceux induis a se resouldre à souffrir & endurer pour la querelle de Dieu, pour la conseruation de la religion, & repos de sa patrie, qui est la seule cause, & le seul subiect de son emprisonnement & detention.

Depuis le tyrân s'aduïsa d'enuoyer les prisonniers à Amboyse, ne les sentât assez asseurer à Bloys, faisant de nuit & deuant le iour leuer monseigneur le Cardinal de Bourbon, & madame de Nemours, sans aucun respect de leur vieillesse, & estant ladiète Dame sur la Greue, attendant le basteau, regardât deuers le Chasteau, où ayant aduisé l'effigie du Roy Loys douziesme son ayeul, dit: monsieur, iamaïs vous n'avez fait construire cette maison vostre, pour seruir de forest ny de massacre a vos petits enfans, qui occasionna la pluspart des assistans, de ietter plusieurs larmes.

Ces meurtres, ces assassinats, ces massacres, ces emprisonnemens faiçts, non à ces Princes, & à ces Seigneurs: mais à vous, ô Catholiques, car les Princes ne sont point morts: mais c'est vous qu'on a massacrez. Ecclesiastiques
c'est à

C'est à vous, à qui on en veut Noblesse,
 c'est vostre chef qu'on a touché, Bourgeois
 Marchans & autres, c'est vous, hélas! que
 l'on tient emprisonnez, ayant attenté és per-
 sonnes de tous vos chefs, vos scipions, vos
 protecteurs, & ceux qui n'auoyent iamais es-
 pargné leur sang, & leurs biens, pour la con-
 seruation des vôtres, & de vostre ville. Tât
 d'inhumanitez tât d'indignitez, tât de cruau-
 tez, tant de coniurations, tant de protesta-
 tions: tout ce que l'on à fait, ce que l'on faict,
 & ce que l'on tasche par cy apres de faire, ne
 feront ce pas esguillôs assez poignants pour
 vous induire & esmouuoir à vne iuste deffêce,
 & à vous encourager à vne iuste vengeance: Se-
 rez vous si desnatûrez que vous voyât trainer
 à la mort, par le cordeau de tyrannie, precipi-
 ter en l'ateisme par l'effort de l'heresie, & ayât
 moyé d'y remedier, vous ne vous y opposiez
 & preniez le remede, n'escontez iamais cest hy-
 pocrite, reiettez son aliance, ses paroles far-
 dees, & emmiellees, ains esloignez-le de vo^r, &
 fuyez de luy cômme d'un diable ennemy mortel
 & côiuré, ne remaschant par toutes ses actiôs,
 que vostre totale ruine desquelles vous n'a-
 uiez que trop de preuues, tant par la vendi-
 tion de la Rochelle comme dit à esté, le lar-
 cin de la vraye croix, la faueur & tollerance
 des heretiques, la protection de Genesue, l'an-
 tre parler du Roy de Nauarre, l'accointance

de la jarretière, la mort de la Royne d'Escosse, par l'atuis & consentement de ce parricide, la mort du Breton, la conseruation de Belloy, toutes les mains leues, donnez aux huguenots de leurs biens saisis, l'armee des Reistres, le siege d'Orleans contre les bons Catholiques, les viollemens incestes & sacrileges des Religieuses en vos plus saincts & deuots monasteres, ce vous sont marques suffisantes, par lesquelles vous le vous pouuez représenter tel qu'il est, mesme son turban vous representoit assez son infidelité estant tousiours coiffé à la turque, lequel iamais on ne luy a veu oster, pour faire honneur à Iesus Christ, mesmes faisant semblant aller contre les Reitres, auoit vn habit d'Allemât fouré, & des crochets d'argent qui signifioit l'intelligence & l'acointance qu'il auoit avec ces empistolez, tellement que vous l'eussiez pris lors pour vn Turc par la teste, allemâ par le corps, Harpye par les mains, Anglois par la iartiere, Polonnois par les pieds & pour vn diable en l'ame, que si ces choses ne sont suffisantes pour vous esmouoir, que l'apprehension du rauissement de vos biens par cest insatiable: par les siens affamez, & rauissement de vos femmes, les meurtres de vos enfans, la perte des ames & des corps d'eux & des vostres, vous facent embrasser ceste resolution, affin que vrayns François, & legitimes enfans de vos peres, vous

conseruiez à la posterité avec autant de soin,
 autant de zelle & d'affection, ce que iceux
 vos peres vous ont tant sainctement acquis
 qui est vostre liberté & Religion.

F I N.

Autre Anagramme de l'Autheur.

La richesse peult.

QVATRAIN.

VN tyran parricide, vn perfide, vn ruzé,
Par impost, par Longnac, par serment, par
feintise,
A pillé, massacré, viollé, mesprisé,
Son peuple, ses parens, sa foy, & son Eglise.

AVTRE QVATRAIN.

VN Turc, vn Alleman, vn Polonois fuitif,
Vn renegat, François, vn Anglois volötif,
Vn Hermite infidel' vn bastard Italien
A ses mains blasphemant souillees au sang
Chrestien.

363.

AV LECTEUR SUR LES
deux anagrammes de l'Auteur.

Avoir appris comment ses deux Princes tous
deux
Sur le corps de Iesus, & sur la foy publicque,
Ont esté massacrez d'une main heretique,
Ce n'est auoir appris qu'un acte malheureux.
Mais ce qui est entré, dans le cœur par les yeux,
Te doit mettre en la main, vne bonne pratique,
La rencontre du nom nom annagrammatique,
Te predit ton salut, si sauuer tu te veux.
Il presche le salut, & La richesse peult
Il est assez aysé d'entendre ce qu'il veult,
Veux-tu tousiours porter le ioug de tyrannie
Tens la gorge au costeau, du tyran inhumain,
Veux-tu sauuer ta foy, le corps, les biens, la vie,
Il fault mettre au thresor ta liberalle main.

364.

